

U skladu sa članom 12. 13. i 14. Zakona o udruženjima i fondacijama (»SI. Novine JFBiH«, br. 45/02) Skupština udruženja »Društvo pčelara Kantona Sarajevo« na sjednici "održanoj 28.04.2009. godine. U Sarajevu, donosi

# STATUT

## UDRUŽENJA »DRUŠTVO PČELARA KANTONA SARAJEVO«

### I - Opšte odredbe

#### Član 1.

Udruženje »Društvo pčelara Kantona Sarajevo« je dobrovoljno povezivanje više fizičkih ili pravnih osoba radi unapređivanja i ostvarivanja zajedničkih opštih interesa ili ciljeva, u skladu sa Ustavom i Zakonom, a čija temeljna svrha nije sticanje dobiti.

#### Član 2.

Ovaj statut sadrži:

1. naziv i sjedište Udruženja;
2. ciljeve i djelatnosti Udruženja;
3. zastupanje i predstavljanje Udruženja;
4. organe Udruženja, njihove ovlasti, načini imenovanja i opoziva, trajanje mandata, kvorumi pravila glasanja, uključujući i pitanja o kojima se odlučuje kvalificiranom većinom, funkciju osobe ovlaštene da saziva Skupštinu;
5. oblik i sadržaj pečata Udruženja;
6. oblik i sadržaj znaka;
7. sticanje i raspolaganje imovinom;
8. način donošenja finansijskog izvještaja i izvještaja o radu;
9. postupak za donošenje statuta, izmjene i dopune statuta i drugih opštih akata Udruženja;
10. uslove i načine učlanjenja, prestanak članstva, kao i prava, odgovornosti i dužnosti članova Udruženja;
11. uslove i postupak za pripajanje, razdvajanje transformaciju ili prestanak rada Udruženja;
12. pravila za raspodjelu preostale imovine u:šlučaju prestanka rada Udruženja
13. ustrojavanje organizacionih oblika udruživanja (podružnice, ogranke, klubove i si.).

#### Član 3.

Puni naziv društva je: »Društvo pčelara Kantona Sarajevo« u Sarajevu. Skraćeni naziv društva je:»Udruženje pčelara« u Sarajevu. Sjedište društva je u Sarajevu, ulica Jadranska broj 5.

#### Član 4.

Udruženje ima svojstvo pravnog lica, sa pravima, obavezama i odgovornostima koje proizilaze iz Ustava, Zakona, ovog Statuta i drugih propisa, te međunarodnih standarda koji se odnose na nevladine organizacije.

## Član 5.

Udruženje stiče svojstvo pravnog lica danom upisa u registar udruženja. Udruženje je nevladina, nestranačka i neprofitabilna organizacija. Udruženje osniva svoje organizacione jedinice na nivou Kantona.

## Član 6.

Udruženje ima svoj pečat i štambilj. Pečat Udruženja je okruglog oblika, prečnika 40 mm, sa ispisanim tekstom u koncentričnim krugovima, latinicom: Udruženje pčelara »Društvo pčelara Kantona Sarajevo«. U sredini pečata nalazi se znak sa urezanim oblikom pčele radilice. Štambilj Udruženja je pravougaonog oblika, veličine 55x20mm.

Štambilj se koristi u korespondenciji Udruženja, a sadrži sljedeće kolone: Udruženje pčelara »Društvo pčelara Kantona Sarajevo« Sarajevo, broj i datum.

## Član 7.

Udruženje ima svoj račun kod poslovne banke u Sarajevu. Udruženje za svoje obaveze odgovara sredstvima kojima raspolaže.

## Član 8.

Udruženje se može udruživati u pčelarske organizacije-saveze na nivou BiH. Odluku o udruživanju donosi Skupština Udruženja.

## **II - Ciljevi i zadaci društva**

### Član 9.

Cilj Udruženja je utemeljenje, razvoj i zaštita pčelarstva i pčelarske proizvodnje u skladu sa materijalnim i prirodnim resursima i međunarodnim standardima.

### Član 10.

Zadaci Udruženja su:

- Uzgajanje i zaštita pčela u Kantonu Sarajevo,
- Razvoj pčelarstva kao poljoprivredne grane i povećanje proizvoda iz ove djelatnosti.
- Unapređivanje pčelarske djelatnosti kroz njeno širenje na što veći broj građana, a naročito na djecu i omladinu.
- Uključivanje članova u Udruženje i njihovu edukaciju na usvajanju novih načina zaštite i uzgoja pčela kao osnovnih uslova za povećanje proizvodnje kroz seminare, pribavljanje literature i časopisa, specijalizacije, prektikume i predavanja.
- Angažovanje na davanju informacija o nabavci, kvalitetu i distribuciji pčelarske opreme i repromaterijala, kao i organizovana nabavka istih za članove Udruženja pod najpovoljnijim uslovima.
- Organizovanje sajamskih manifestacija
- Omasovljenje i uključivanje što većeg broja pčelara pojedinaca i srodnih organizacija i udruženja.

- Stručno usavršavanje i obrazovanje članova udruženja, uspostavljanje saradnje sa pčelarskim organizacijama u BiH i inostranstvu. poduzimanje organizovanih mjera sa drugim organizacijama i institucijama na suzbijanju zaraznih i drugih pčelinjih bolesti i štetočina, borba protiv zagađivane sredine i podrška ekološkim programima, saradnja i koordinacija sa vladinim i nevladinim sektorom u cilju boljeg razvoja ove djelatnosti.
- Aktivnosti na davanju inicijativa za zakonodavno uređenje oblasti pčelarstva.

#### Član 11.

Udruženje može organizovati privrednu i uslužnu djelatnost osnivanjem privrednih subjekata za obavljanje djelatnosti iz oblasti pčelarstva, u skladu sa Zakonom. Udruženje za organizovanje sajamske manifestacije može angažovati vlastite i druge subjekte.

### III - Javnost rada

#### Član 12.

Udruženje zasniva svoju djelatnost i razvija aktivnosti na principima dobrovoljnosti članova, na javnosti svoga rada i na međusobnoj saradnji sa zainteresovanim organima, privrednim subjektima i drugim pravnim licima.

#### Član 13.

Rad Udruženja je nezavisan i javan.

Udruženje će poslovati uz poštivanje principa javnosti i transparentnosti.

Obavještavanje javnosti o radu Udruženja obezbjeđuje se:

- otvorenosti sastanaka Udruženja i njegovih organa,
- objavljivanjem informacija o radu udruženja u časopisima, dnevnim novinama i drugim sredstvima informisanja,
- isticanjem na oglasnoj ploči Udruženja svih informacija o radu i aktivnostima,
- pozivom na sjednice organa Udruženja predstavnika državnih organa, privrednih subjekata i drugih pravnih lica,

Za ostvarivanju načela javnosti i transparentnosti rada odgovoran je predsjednik Udruženja.

### IV - Članovi Udruženja, njihova prava i dužnosti

#### Član 14.

Član Udruženja može biti svaki građanin koji je nastanjen na području Kantona Sarajevo. Članovi Udruženja mogu biti i prijatelji pčelarstva koji žele da aktivno djeluju, kao i pomažući članovi privrednih, humanitarnih i drugih subjekata koji imaju interese u ovoj djelatnosti.

Stupanje u članstvo Udruženja je dobrovoljno, a zasniva se na izvršavanju prava i obaveza određenih ovim Statutom i drugim opštim aktima Udruženja.

#### Član 15.

Za stugaliife u članstvo pristupnica se podnosi Sekretaru Udruženja. U vlastoručnom potpisanoj pristupnici budući član Udruženja izjavljuje daje voljan postati članom udruženja, da su mu poznate odredbe Statuta o pravima i obavezama daje voljan da se pridržava prava i obaveza.

Građanin koji bude primljen za člana Udruženja upisuje se u evidenciju Udruženja i uručuje mu se članska kartica.

Članovi Udruženja iz člana 14. stav 1. statuta, dužni su da redovno uplaćuju članarinu, a najkasnije do 31.03. tekuće godine. Visinu članarine određuje Skupština Udruženja posebnom odlukom.

#### Član 16.

Članovi udruženja mogu biti aktivni, počasni i pomažući.

- Aktivni članovi Udruženja su aktivni građani-pčelari sa područja Kantona Sarajeva, koji su redovni članovi, te aktivno učestvuju u njegovom radu.
- Počasni članovi Udruženja su pravna i fizička lica koje Skupština Udruženja izabere za počasne članove, pod uslovom da su u svojoj aktivnosti doprinijeli razvoju pčelarstva.
- Pomažući članovi Udruženja su svi članovi koji plaćaju članarinu i učestvuju u radu i aktivnostima Udruženja.

Svi članovi Udruženja za svoj rad i aktivnosti u Udruženju nemaju nikakvu materijalnu naknadu, već iste obavljaju volonterski.

Izuzetak od prethodnog stava čine poslovi i aktivnosti koje članovi Udruženja obavljaju po posebnoj odluci Upravnog odbora.

Odluka Upravnog odbora treba sadržavati opis i vrstu poslova za čije obavljanje članovi imaju pravo na naknadu, te visinu i način isplate naknade.

#### Član 17.

Za različite zasluge i doprinos u razvoju i unapređenju pčelarstva i Udruženja, član može biti: pohvaljen, nagrađen i unaprijeđen.

Odluku o priznanjima donosi Skupština Udruženja, na prijedlog Upravnog odbora.

#### Član 18.

Članstvo u Udruženju prestaje: istupanjem člana, smrću člana, isključenjem, neplaćanjem članarine od jedne godine i prestankom rada rada Udruženja. Prestanak članstva u Udruženju povlači za sobom gubitak svih funkcija u Udruženju.

#### Član 19.

Odluka o isključenju iz članstva donosi Upravni odbor kada član teže povrijedi odredbe ovog Statuta ili ako radi protivno ciljevima i interesima Udruženja. Protiv odluke o isključenju može se podnijeti prigovor Skupštini Udruženja putem Upravnog odbora u roku od petnaest dana od dana prijema odluke. O prigovoru odlučuje Skupština Udruženja, čija je odluka konačna.

### **V - Oblici organizovanja i organi Udruženja, njihva prava, obaveze i odgovornosti**

#### Član 20.

Udruženje djeluje na teritoriju Kantona Sarajevo.

## Član 21.

Udruženje može formirati svoje podružnice na različitim teritorijalnim jedinicama koje pripadaju Kantonu Sarajevo. Podružnicu može formirati tri i više članova Udruženja. Podružnica se može formirati za jednu ili više teritorijalnih jedinica, ako je to u interesu članova Udruženja.

## Član 22.

Podružnica nema status pravnog lica.

Osnivači podružnice biraju rukovodioca podružnice koji je odgovoran za rad iste. Rukovodilac podružnice može ali ne mora biti po funkciji i član Upravnog odbora Udruženja i za svoj rad odgovoran je Upravnom odboru, kome o radu podružnice podnosi pismeni godišnji izvještaj.

## Član 23.

Podružnica u svom radu i djelovanju ostvaruje ciljeve i zadatke koji su u skladu sa ovim Statutom.

## Član 24.

Udruženje ima sljedeće organe:

- Skupština Udruženja
- Upravni odbor
- Nadzorni odbor
- Komisije različite namjene

A - Skupština Udruženja

## Član 25.

Skupština Udruženja je najviši organ upravljanja na kojoj članovi Udruženja neposredno odlučuju o pravima i obavezama iz djelatnosti Udruženja. Skupština Udruženja javnim glasanjem bira organe upravljanja Udruženja, na period od četiri godine.

## Član 26.

Skupštinu čine svi članovi Udruženja s jednakim pravom glasa.

## Član 27.

Skupština Udruženja:

- Donosi statut, izmjene i dopune i druge akte određene statutom;
- Daje saglasnost na pravne radnje poduzete u postupku osnivanja Udruženja;
- Bira i opoziva članove Upravnog odbora;
- Usvaja izvještaje koje je pripremio Upravni odbor;
- Odlučuje o udruživanju u saveze, pripajanju, razdvajanju, transformaciji, prestanku rada i drugim statusnim promjenama Udruženja;

- Utvrđuje program rada Udruženja;
- Donosi finansijski plan i usvaja završni račun Udruženja;
- Određuje način i visinu plaćanja članarine;
- Bira predsjedavajućeg Skupštine Udruženja i članove Upravnog odbora Udruženja, predsjednika Udruženja, koji je ujedno i predsjednik Upravnog odbora, a po potrebi i ostala tijela Udruženja;
- Odlučuje o svim pitanjima koja nisu u nadležnosti drugog organa.

#### Član 28.

Rad Skupštine je javan, a odluke se donose nadpolovičnom većinom prisutnih članova Udruženja, ali ne manje od prisutnih trideset članova Udruženja. Sjednice skupštine se održavaju po potrebi, a najmanje jedanput godišnje. Skupština treba biti sazvana najmanje petnaest dana prije održavanja, sa naznačenjem prijedloga dnevnog reda, mjesta i vremena održavanja.

#### Član 29.

Pozivi za skupštinu, sa prijedlogom dnevnog reda trebaju biti dostavljeni svim članovima i drugim zainteresovanim licima koja učestvuju u radu Skupštine. Radni materijali za Skupštinu će se staviti na raspravu članovima Udruženja na oglasnoj tabli Udruženja petnaest dana prije zasjedanja.

#### Član 30.

Skupština bira predsjedavajućeg Skupštine pri svakom zasjedanju Skupštine Udruženja. Predsjedavajući Skupštine rukovodi radom Skupštine uz pomoć radnog predsjedništva. Na prijedlog predsjedavajućeg, Skupština bira dva zapisničara i ovjerivača zapisnika.

#### Član 31.

Predsjednik Udruženja saziva Skupštinu i predlaže dnevni red. Skupština se mora sazvati kada to zahtjeva trećina članova Udruženja ili Upravni Odbor.

#### Član 32.

Predsjednik Udruženja u okviru svojih ovlaštenja obavlja slijedeće poslove:

- predstavlja i zastupa Udruženje u odnosima sa drugim subjektima u zemlji i inostranstvu,
- zajedno sa Upravnim odborom predlaže osnovne pravce politike Udruženja,
- zajedno sa izvršnim sekretarom koordinira sve aktivnosti Udruženja između sjednica Skupštine i Upravnog odbora,
- u odsutnosti predsjednika Udruženja mijenja izvršni sekretar ili drugi član Upravnog odbora kojeg ovlasti predsjednik Udruženja.

Mandat predesjednika udruženja traje četiri godine sa mogućnošću reizbora.

### **B- Upravni odbor**

#### Član 33.

Upravni odbor je izvršni organ Skupštine Udruženja, koji obavlja izvršne poslove u radu i poslovanju Udruženja i sprovodi smjernice i zaključke Skupštine Udruženja.

#### Član 34.

Upravni odbor se sastoji od pet članova koje bira Skupština Udruženja. Mandat članova Upravnog odbora traje četiri godine sa mogućnošću još jednog izbora. Predsjednik Udruženja ne može biti biran na funkciju predsjednika Upravnog odbora.

Predsjednika Upravnog odbora bira Skupština Udruženja na rok od četiri godine, sa mogućnošću još jednog izbora. Predsjednik Udruženja je po funkciji član Upravnog odbora.

#### Član 35.

Radom Upravnog odbora rukovodi predsjednik, a u njegovoj odsutnosti lice kojeg on ovlasti.

#### Član 36.

Sjednice Upravnog odbora održavaju se po potrebi, a zakazuje ih i njima rukovodi predsjednik Upravnog odbora. Upravni odbor punovažno odlučuje ako sjednici prisustvuje više od polovine njegovih članova. Na sjednicama se obavezno vodi zapisnik u koji se unose imena prisutnih članova, kao i odluke i zaključci donesene na sjednici.

#### Član 37.

Za svoj rad Upravni odbor odgovara Skupštini Udruženja.

Upravni odbor podnosi Skupštini Udruženja izvještaj o svom radu između dvije sjednice Skupštine.

#### Član 38.

Upravni odbor obavlja slijedeće poslove i zadatke:

- stara se o ostvarivanju prava i dužnosti Udruženja i radi na realizaciji programa Udruženja, zadataka i zaključaka koje donosi Skupština i u tom smislu usmjerava cjelokupnu djelatnost Udruženja,
- stara se o pravilnom obavljanju materijalno-finansijskog poslovanja i administrativno-stručnih poslova,
- saziva sjednice Skupštine Udruženja i priprema materijale sa dnevnim redom sjednice,
- stara se o obezbjeđenju uslova za rad Udruženja,
- priprema i utvrđuje prijedloge izmjena i dopuna Statuta i programa rada Udruženja, i drugih akata koje donosi Skupština,
- utvrđuje prijedlog programa rada, finansijskog plana i završnog računa,
- organizuje sprovođenje programa rada,
- podnosi izvještaje o radu Skupštine na razmatranje i usvajanje,
- utvrđuje i vodi poslovnu politiku Udruženja,
- vrši nadzor i kontrolu rada izvršnog sekretara Udruženja,
- obavlja i druge poslove u skladu sa Zakonom, Statutom i drugim opštim aktima Udruženja.

#### Član 39.

Članovi Upravnog odbora su volonteri i nemaju nikakve prinadležnosti, direktne i indirektno koristi koje proizilaze iz njihovog rada i djelovanja u Upravnom odboru Udruženja.

#### Član 40.

Predsjednik Upravnog odbora odgovoran je za svoj rad Upravnom odboru i Skupštini Udruženja.

#### Član 41.

Predsjednik Upravnog odbora ima slijedeća prava i obaveze:

- predstavlja Udruženje pred trećim licima,
- uz izvršnog sekretara i ostalih članova Upravnog odbora priprema sjednice Upravnog odbora i Skupštine Udruženja,
- saziva sjednice Upravnog odbora i predlaže dnevni red, potpisuje akte koje donosi Upravni odbor i Skupština, S t stara se o izvršenju odluka i zaključaka Upravnog odbora i Skupštine,
- obavještava članove Udruženja o radu Upravog odbora, donesenim odlukama i zaključcima na sjednicama,
- obezbjeđuje javnost i transparentnost u radu Udruženja,
- vrši i druge poslove koje mu stavi u nadležnost Upravni odbor i Skupština Udruženja.

#### Član 42.

##### **C- Nadzorni odbor**

Nadzorni odbor je izvršni organ Skupštine Udruženja, koji obavlja izvršne poslove kontrole finansijsko - materijalnog poslovanja Udruženja i sprovodi smjernice i zaključke Skupštine u vezi sa navedenim poslovima.

#### Član 43.

Nadzorni Odbor se sastoji od tri člana koje bira Skupština Udruženja. Mandat članova Nadzornog odbora traje četiri godine sa mogućnošću još jednog izbora. Za svoj rad Nadzorni odbor odgovara Skupštini Udruženja,kojoj podnosi izvještaje o svom radu između dvije sjednice Skupštine.

#### Član 44.

Radom Nadzornog odbora rukovodi predsjednik koga biraju članovi Nadzornog odbora na svojoj konstituirajućoj sjednici,koja mora biti održana u roku od sedam dana od dana izbora članova Nadzornog odbora.

Sjednice Nadzornog odbora saziva predsjednik Nadzornog odbora a održavaju se po potrebi, ali najmanje 2 puta godišnje.

#### Član 45.

Odluke Nadzornog odbora donose se većinom prisutnih članova i obavezujuće su,a izvršenje odluka obezbjeđuje se preko Upravnog odbora Udruženja.

#### Član 46.

Nadzorni odbor obavlja sljedeće poslove i zadatke:

- Vršiti kontrolu zakonitosti donijetih odluka u Udruženju u vezi korištenja i raspolaganja finansijsko -materijalnim sredstvima,



- Vršiti kontrolu zakonitosti izvršenja odluka o korištenju i raspolaganju finansijsko - materijalnim sredstvima,
- Vršiti kontrolu ažuriranja finansijsko-materijalne dokumentacije, utvrđuje nedostatke i predlaže mjere u otklanjanju istih,
- izvršenim kontrolama i uočenim zapažanjima sačinjava pismene izvještaje Skupštini Udruženja, o čemu upoznaje i Upravni odbor Udruženja,
- Vršiti i druge nužne poslove i zadatke iz okvira svoje nadležnosti.

#### Član 47.

Udruženje ima izvršnog sekretara kojeg imenuje Upravni odbor i koji ima slijedeća prava i obaveze:

- stara se o odvijanju rada Udruženja u skladu sa zakonom, Statutom, smjernicama Skupštine, odlukama i zaključcima Upravnog odbora kao i sa međunarodnim konvencijama iz ove oblasti,
- pomaže predsjedniku Udruženja - Upravnog odbora u obavljanju njihovih zadataka, te organizuje pripreme sjednica Skupštine, Upravnog odbora i ostalih organa Udruženja,
- brine se o izradi akata koje donosi Skupština i Upravni odbor Udruženja,
- između sjednica Skupštine i Upravnog odbora zajedno sa predsjednikom Udruženja - Upravnog odbora obavlja konsultacije,
- vrši dogovaranje i razmjenu mišljenja o izvršavanju zadataka i poslova Udruženja, kao i o takućim aktivnostima Udruženja,
- zastupa Udruženje u poslovima iz svoje nadležnosti i u dogovoru sa predsjednikom Udruženja - Upravnog odbora,
- organizuje i vodi administrativne poslove,
- čuva pečat i štambilj Udruženja i rukuje sa njima.

Izvršni sekretar za svoj rad odgovara Skupštini i Upravnom odboru Udruženja.

#### Član 48.

Izvršiti sekretar Udruženja je profesionalno lice sa sklopljenim Ugovorom o radu na pola radnog vremena, a imenuje se na period od četiri godine, sa mogućnošću ponovnog imenovanja.

### **VI - Opšti akti Udruženja**

#### Član 49.

Pod opštim aktima Udruženja podrazumjevaju se: statut, pravilnici, poslovnici o radu organa Udruženja, odluke, programi i planovi rada. statut i drugi opći akti, osim odluka i poslovnika o radu Udruženja Upravnog odbora, moraju se prije usvajanja staviti na javnu raspravu članovima Udruženja. Opšti akti Udruženja, osim statuta stupaju na snagu osam dana od objavljivanja na oglasnoj ploči Udruženja.

### **VII- Zastupanje i predstavljanje**

#### Član 50.

Udruženje predstavlja i zastupa Predsjednik Udruženja i Predsjednik Upravnog odbora. Njihov mandat je četiri godine sa pravom reizbora.

### **VIII- Obezbjedivanje finansijskih uslova za rad**

#### **Član 51.**

Finansijska sredstva za rad mogu se obezbjeđivati iz slijedećih izvora:

- članarine, donacije, dotacije i na druge načine koji su u skladu sa zakonom.

### **IX- Finansijski izvještaj i izvještaj o radu**

#### **Član 52.**

Skupština je dužna najmanje jednom godišnje usvojiti finansijski i izvještaj o radu 2/3 većinom glasova. Navedene izvještaje Skupštini priprema i dostavlja Upravni odbor.

### **X- Transformacija, pripajanje, razdvajanje**

#### **Član 53.**

Udruženje se može transformisati, pripojiti, razdvojiti kada to odluči Skupština udruženja 2/3 većinom glasova.

### **XI – Prestanak rada Udruženja**

#### **Član 54.**

Udruženje prestaje sa radom: kada odluči Skupština Udruženja i kada nadležni organ donese rješenje o prestanku rada Udruženja u skladu sa Zakonom. Odluka Skupštine o prestanku rada društva mora se dostaviti nadležnom upravnom organu. U slučaju prestanka rada, imovina Udruženja predaje se na čuvanje Pčelarskoj organizaciji Federacije Bosne i Hercegovine - Bosne i Hercegovine, dok se ne osnuje drugo Udruženje, odnosno organizacija sa istim ili sličnim ciljevima i zadacima.

### **XII - Završne odredbe**

#### **Član 55.**

Tumačenje odredaba ovog statuta daje Skupština Udruženja. Ovaj statut stupa na snagu danom usvajanja na Skupštini Udruženja, a primjenjivat će se od dana potvrde istog od strane nadležnog upravnog organa Kantona Sarajevo.

Sarajevo, 28.04.2009. godine

Broj, 1-1-09-S

Predsjedavajući Skupštine  
Ismet Mehić